

同岑集

三



同岑初集卷七

桃城潘居貞天行輯

潯水張道岸懸渡參

韋人鳳

六象

雜詩

二月城東路桃李並芳菲風雨一朝至飄落委中逵陽
春不久榮況當清秋時白露凝爲霜百草淹離披蕭蕭
楓樹林木葉亦以摧戕戕西山上矯然松柏姿獨立千
載閒高風迴自持

南陔有嘉樹朱實何離離陰雲蔽白日驚颯折其枝盤
根一以萎木葉紛以披虛堂生哀響孤燕白翻飛茫茫

失所恃悲鳴將疇依俯仰天地閒涕下如綆糜願同庶
物化冥漠無所知

離離海月上啞啞塞雁還長風吹萬里哀聲入雲端沈
憂結心曲感物思所歡嘉會不我值山川阻且艱期我
以春陽芳草今已殘含情欲告誰俯仰起長歎

山居雜詠

高秋澄曠野白露塗遙岑木落層峰出山高羣壑陰初
陽方垂曜夕照忽已沈叢桂逗清馥寒蛩發哀音冽冽
朔風至皎皎夜月臨草際流泉動樹杪孤猿吟壯懷更
靡薄憂思不可任坎坎漸離筑惻惻雍門琴遇物增遙
歎俯仰傷我心

集孚尹同人於清遠堂卽席賦懷

清遠堂開西郭偏
攜樽共醉菊花前
飄零空抱依劉計
貧病猶存御李緣
寒雨梧桐三徑夜
秋風鴻雁五湖天
山川滿目情何限
回首新亭倍黯然

長溪落木自蕭蕭
天外帆檣度石橋
白首何年重把袂
青雲今日得聯鑣
秋聲散入千峰雨
朔氣寒蒸半夜潮
誰識酒闌人去後
江城有客尙吹簫

茆廬草徑傍巖阿
上客論交列騎過
漢殿雲霄雙玉珮
吳江風雨半漁蓑
愁深永夜烏嘯急
醉入荒城虎嘯多
欲說舊游還寂寞
不堪短鬢白蹉跎

短髮長歌醉濁醪
相逢意氣爲誰豪
風迴古戍銅鑱斷

月暗空庭玉樹高
末座偏成鸚鵡賦
名家自有鳳凰毛
欲呼小友真難侶
慚愧梁園舊綵毫

輓章子芝黃

秋高玉笛起江亭
併入山陽曲裏聽
不信芝蘭沈白草
空畱泉石護玄經
天南孤雁含愁度
薊北千峰繞夢青
欲賦招魂何處是
空教風雨問湘靈

吳閑

尙之

田居

種瓜瓜欲繁
藝禾禾欲秀
灌溉不及時
功候豈能驟
潛魚翻小渚
好鳥喚清晝
曳杖來老翁
言言敦故舊

修修庭中竹
垂垂河畔柳
箕踞坐涼飈
披襟不蔽肘
婦

言耕作勞爲我沽村酒酒酣歌烏烏三星已在罍

斷橋

晴光搖蕩舊山河挈伴還來坐綠莎忽憶當年歌舞處
數聲哀雁下前坡

晚香菴卽事

僻居久與世相違坐看漁舟弄晚暉花覆階除羣鳥亂
月明煙水一僧歸

吳啟思

睿公

感遇

翼翼西飛鴻矯矯鳴佳晨飛鳴將何求願言求其羣明
月淨芳甸清霜肅長林所虞增繳傷賴此羽毛新孤鶩

表貞特頡頏感交親如何籬下棲將無雞鶩鄰相思幸
相勗君子愛千金

詠懷

層冰塞長川曠野多悲風遊子離故鄉哀哀歧路中故
鄉不可卽道里幾千億欲去雲無航回首淚沾臆沾臆
誰與言虎豹橫九關飛鳥求其曹啞啞枯樹顛援琴多
商聲酌酒飲不歡白霧何沈冥四顧愁容顏

驅車歷平陸頓轡循隆坻棗實旣纂纂黍苗亦離離征
徒指煙火倦馬鳴青圻升堂拜主人魯酒羅中閨顧茲
居者歡翻念游者悲瞬息爲樂康眷眷有餘悽昊穹布
愷澤萬彙仰恩輝誰謂一物枯有隘皇天慈宮中貴蛾

眉季女長渴飢

涼秋九月中素魄皓以盈狂飈吹沙磧千里無人行白
露何皚皚繽紛下寒汀旅燕辭故巢惻愴不能鳴如何
金閨彥而作飛蓬征雄劍倚天外陸離亘華纓長揖謝
當途激昂忘世情玉笋薦黃流悲歌振商聲豈不惜搖
落意氣秋山橫去去何所道琴堂清復清

海水蕩日月海風天外來吹我素羅襟奄忽凌崔巍崔
巍多瓊樓皎潔似蓬萊山人珥明璫鸞笙而霞杯云是
仙子家顧非玉京才遲回念前身恟恍有餘哀世故尙
紛糾交甫懼無媒

菊旃先生選吳興詩率爾柬賦

騷雅久放廢何李激頽波茂苑與瑯琊格調多規摹大
音何琅琅肆好在闊疏公安得袁生偶儻學東坡譬之
江瑤柱俊味疇能沾晚節競繁囂鍾譚振典謨憂憂去
陳言肺腑流清腴唐皇三百秋豈謂唐風徂斯道旣天
喪簧鼓在小儒專家互排擊炫亂增煩紆寧知飛燕美
不與玉環殊刻棘爲沐猴觀者傷錙銖夫子實天縱正
聲繼李蘇膝上有文度風采更麗都願言決秋湄寶珠
出菰蒲

長干行

長干橋下長千里曉日溶溶照羅綺紫陌流鶯百徧呼
長干美人嬌不起橋邊江水鳴頭綠盡日東風皺寒玉

畫槩蘭橈兩兩開
錦鴛白鷺雙雙宿
柳花如毬滿店香
青帘倒影琥珀缸
幾行朱鬣新調馬
幾度銀鞍七寶裝
裝成騎入落花去
花氣迷離接江霧
低頭一聽竹西歌
回看已沒東山樹
東山自古擅繁華
蠟屐雲鬟太傅家
高情不與河山老
至今玉樹臨風斜
儂在江南多恨骨
一朝對此增愁絕
明月寒塘春復春
梨花小燕誰家客
聞道芳湖字莫愁
金樽檀板且淹畱
烏衣巷裏烏嘯急
何處重尋孫楚樓

射陽湖

洪河去不息鄉思與悠悠
地圻東南壯天將日月流
魚龍悲靜夜貔虎護高秋
極目輕鷗外微茫何處舟

清源

齊驅無復覩魯酒尙能紅棗栗平沙路魚鹽大國風人
煙寒蔓草暮色起孤篷地闊容車馬河濱有寓公
凍雲終脉脉落日故遲遲草淺飢鷹樂冰堅渴馬悲斷
垣曾出火臥棟復生枝亂後生涯少居人只釣絲

再過射陽湖

風意憑流怒雲歸不敢停接天千里白浮樹一痕青漁
父垂綸小閒鷗入霧冥醉吟須磊落簾外有湘靈

臥病束蒿來兼憶湘溪舊游

萬頃葡萄綠滔滔□草堂不眠山色好遠俗酒杯香短
櫂來吳市長吟舊楚狂行藏知有定吾意在滄浪

丙申正月游白門經松陵冰堅不得渡風氣蕭瑟
一似曩歲阻冰濟北因憶此時呵凍狂吟尙有嵩
來其人者悵然久之賦詩卻寄

村犬聲如豹江豚浪似舟君歸華子宿余慕長卿游各
賦池生草相逢麥報秋東臯有佳興頗憶秣陵不

廣陵懷古

天子工詞賦風流自一時馬蹏清夜疾雀尾翠華遲君
夢江都好人歌楊叛兒河山與文藻搖落兩堪悲

金陵雜感

金粉六朝春車書萬國賓先皇遺劒舄古色照荆榛宮
闕聲名壯閭閻士女新由來形勝地感動旅游人

春色動簾鉤。飛花入鏡流。烏衣芳草合。桃葉暮煙愁。石
去珠沈井。人空燕入樓。尙餘風月在。少婦響箜篌。

長安秋興

百年壯麗未央宮。蕭相雄圖想像中。虎踞燕山星拱北。
龍翔漢闕日仍東。飛花晝繞罽恩靜。落月宵看複道空。
五柞近聞方有賦。禁林還益幾新豐。

社集慈仁寺松下偕同人拈韻得松字

岌嶢寶閣俯羣峰。極目蒼蒼盡漢封。四塞山川惟鼓角。
九霄臺館自歌鐘。上林樹老聞棲鳳。大澤秋深有臥龍。
日暮諸天環珮冷。幾疑風雨在秦松。

歸舟感懷同嵩來賦

半生日日似飄萍，卻憶蘭臺聽雨情。
紅藥香來春婉變，錦纏曲罷酒崢嶸。
道人不作金華夢，勝事偏畱玉冊名。
翻惜鳳凰城下路，瑤池人去月空明。

西湖雜詠

斷篷柔艣不禁風，愁殺挈舟蓑笠翁。
好向湖橋一回住，明朝併入畫圖中。

寄家緘繫之以詩

碧梧霜老鳳凰城，擣練淒淒暮色清。
此夜辟纊應有恨，艱難還憶棄繻生。

代姬人懷友

八月濤生月滿川，思君淚壓廣陵船。
雁飛正出交河北，

那得明珠到妾前

菊朝偶成

桂花銷歇菊花黃
西塞山邊萬樹霜
醉臥石橋呼不起
有人來自采芝鄉

王端宗

岱松

贈邵淡人

荆溪何悠悠銅峰何鑿鑿
宛在水中央伊人芳杜若
蕙帶薜蘿衣典型恍如昨
叔度千頃波澄渟總難度
吹氣幽似蘭靜致閒於鶴
昔重畫中詩詩中畫隱躍
曲折構思奇驚人筆始落
我生四十年知交殊寂寞
兀對兩無言往來神所託
明月滿牀頭古道照珠箔

採桑行

桑柘枝頭唬看火誰家小婦眉雙鎖攜筐不耐五更寒
雨鬢風鬟立道左幾番飼罷始三眠明珠纍纍追靈泉
組織未成縑未絕催科剝啄在門前長安游冶豪奢甚
紈綺翩翩河上飲相思淚滿鮫綃紅尙想天孫裁雲錦
抑知東南杼軸空蘿薜爲衣芰爲綱官守當時合上意
可憐咽月號寒蟲憶昔情牽太液柳劈縐爲裘今在否
絳仙徒賜石帆綾裂縐戲鳧繞殿走君不見幽風一幅
圖畫閒櫛沐春暉未得閒但願經緯能如此大庇天下
俱懽顏

晚櫂

淡淡暮陰平微醺一葉輕霞明山帶織風細水鱗生永
好歌投李憂懷賦采蘅不禁殘照裏擊楫誓河清

觀馬

苜蓿春高薇草鮮房星今已在吳躔雲橫柳葉嘶風鐙
錦爛桃花滿月驕伏櫪向懷千里志空羣幸遇九方歎
獨憐冀北多良駿尙服鹽車歎暮年

嚴先珪

興公

出塞

躡入無風塞旋橫蘆子關邊人報烽火使者叩銅鑲白
澤調京衛烏號發朵顏相迎三百戰不放隻輪還

吳

錡

匡東